

Tlhophiso ea Kereke le Bonngoe



SABATHA MANTSIBOEA

Bakeng sa Boithuto ba Beke Ena Bala:

Ba-Ef.5:23-27;Matt. 20:25-28;Tite 1:9; Matt. 16:19; Ba-Gal. 6:1, 2; Matt. 28:18-20.

Teman'a Khopolo:

“Ho se ke ha e-ba joalo ho lona, empa mang le mang ea ratang ho ba moholo har'a lona, e ke e be mohlanka oa lona; 'me mang le mang ea ratang ho ba oa pele har'a lona, e be mofo oa lona'”(Mattheu 20:26, 27).

Re le Baleti ba Bolokang Letsatsi la Bosupa, re Bakreste ba Maporosetanta ba lumelang hore pholoho e tla ka tumelo feela ho seo Kreste a se etselitseng batho. Ha re hloke kereke kapa tlhahlamano tsa teng hore re fumane melemo ea seo Kreste a re etselitseng sona. Seo re se fumanang ho Kreste re se fumana ho tsoa ho Eena ka kotloloho, joaloka ha a nka sebaka sa rona sefapanong, hape joaloka moprsita ea kenang lipakeng sehalelong sa leholimo. Leha ho le joalo, kereke e hlotsoe ke Molimo, 'me Molimo o e behile mona bakeng sa rona, eseng hoba mocha oa pholoho empa e le sesebelisoa sa ho re thusa ho fetisa le ho tsebahatsa pholoho eo lefatšeng. Kereke ke setsi se entsoeng ke Jesu ho hasa evangeli lefatšeng. Tlhophiseho e bohlokoa ha feela e tiisa le ho akofisa thomo ea kereke. Kantle ho tlhophiso ea kereke, molaetsa oa Jesu o pholosang o ka se fetisetsoe ho ba bang hantle. Baetapele ba kereke ba bohlokoa, le bona, ha ba khotlaetsa bonngoe le ho ba mohlala oa Jesu. Bekeng ena re ithuta hore na hobaneng tlhophiso ea kereke e le bohlokoa thomong le kamoo e ka tlisang bonngoe.

**Ithute thuto ea beke ena ho lokisetsa Sabatha sa la 23 Tšitoe.*

Kreste, Hlooho ea Kereke

Joalokaha re se re bone Thutong e fetileng, Testamenteng e Ncha kereke e rehelloa ka 'mele. Kereke ke 'mele oa Kreste. Thehello ena e fupere limelo tse 'maloa tsa kereke le likamano tsa Kreste le batho ba Hae. E le 'mele oa Kreste, kereke e itšetlehile ho Eena bakeng sa ho phela ha eona. Ke hlooho (Ba-Kol. 1:18, Ba-Ef.1:22) le mohloli oa bophelo ba kereke. Ntle ho Eena ho ka se be le kereke. Kereke e boetse e okha boitsebiso ba eona ho Kreste, hoba ke Eena mohloli le motheo le Moqapi oa seo e se lumelang le ho se ruta. Leha ho le joalo, kereke e feta ntho tsena, leha li le bohlokoa hakaalo boitsebisong ba eona. Ke Kreste le Lentsoe la Hae joalokaha ho senotsoe Mangolong se bontšang hore na kereke ke eng. Kahona, kereke e okha boitsebiso le bohlokoa ba eona ho Kreste.

Ho Ba-Efese 5:23-27, Pauluse o sebelisa likamano pakeng tsa Kreste le Kereke ea Hae ho hlalosa mofuta oa likamano tse lokelang ho ba teng lipakeng tsa monna le mosali. Kutloisiso tse ka sehloohong likamanong tsa Kreste le kereke ea Hae ke life?

Leha re ka ba le lekhoneho ka taba ea boikokobetso ka baka la kamoo baetapele bo sebelisitseng hampe kateng lemong tse fetileng, leha ho le joalo, kereke e tlameha ho ikokobeletsa hlooho, e leng Kreste, le ho ikokobeletsa matla a Hae. Ha re amohela Kreste e le hlooho ea kereke ho re thusa ho hopola moo qetellong botšepahi ba rona bo tlamehang ho ba teng, e leng ho Molimo feela e seng kapa kae. Kereke e tlameha ho hlophiseha, empa tlhopiso e joalo e tlameha ho lula e ikokobelitse matla a Kreste, moetapele oa 'nete oa kereke ea rona. “Kereke e ahiloe holima Kreste e le motheo oa eona; e tlameha ho mamela Kreste joaloka hlooho ea eona. Ha e ea tlameha ho itšetleha holima batho, kapa ho laoloa ke batho. Batho ba bangata ba re maemo ao b'a tšepetsoeng ka kerekeng a ba fa matla a ho laela batho seo ba tlamehang ho se lumela le seo ba tla se etsa. Sena ha se chaeloe monoana ke Molimo. Mopholosi o oa phatlalatsa, 'bohle le baena.' Bohle ba ka lekoa, ba ka etsa liphoso. Re ka itšetleha ho ea matla 'ohle bakeng sa tataiso. Lefika la tumelo ke boteng bo phelang ba Kreste ka kerekeng. Ke mona moo ea fokolang ho feta bohle a ka itšetlehang, 'me ba ikukang ba le matla ho feta ba bang ba tla senoleha hore ba fokola ho feta bohle, ntle le hore ba etse Kreste matla a bona .” —Ellen G. White, *The Desire of Ages*, leq. 414.

Ke joang re ka ithutang ho itšetleha ho Kreste e seng ho eng kapa eng “e felang,” hobane ho bonolo haholo ho etsa joalo?

Boetapele ba Bohlanka

Nakong ea bosebeletsi ba Hae le barutuo ba Hae, Jesu O ile a feta maemong ao a neng a khathalitsoe ke lenyora la matla leo ba neng ba bonahala ba e-na le lona. Baapostola ba ne ba bonahala ba e-na le lenyora la ho ba baetapele ba matla ba 'muso oa Jesu (Mareka 9:33, 34; Luka 9:46). Le nakong eo barutuo ba neng ba e-ja Selallo sa ho Qetela 'moho, boikutlo ba bona ba ho phahama le ho ba le maemo bo ne bo utloahala har'a bona (Luka 22:24).

Nakong ea ketsahalo e kang ena, Jesu o ile a buoa maikutlo a Hae ka ho hlaka malebana le baetapele ba semoea har'a batho ba Hae. Ke metheo efe ea boetapele eo re ithutang eona khothatsong ea Jesu ho Mattheu 20:25-28? Ke joang re ka bontšang motheo oo maphelong a rona, haholo-holo likerekeng tsa rona?

“Litemaneng tsena tse hlakileng Jesu o fana ka mefuta e 'meli ea matla. Oa pele ke oa Boroma. Mofuteng ona, bahlomphehi ba okamela ba bang. Ba na le matla a ho etsa liqeto 'me ba lebeletse hore ba okametsoeng ba ikobele tsona. Ka ho hlaka, Jesu o ile a hanana le mofuta ona oa boetapele h'a re, 'ho se be joalo ho lona!' Ho fapana le hona, o ile a fa barutuo mofuta o mocha o babatsehang oa boetapele, o fapaneng hole le oa ho rena holim'a ba bang oo ba neng ba o tloaetse.”—Darius Jankiewicz, “Serving Like Jesus: Authority in God’s Church,” *Adventist Review*, Hlakubele 13, 2014, leq. 18. Taba ea matla ao Jesu a a bolelang paleng ena a itšetlehile mants'oeng a mabeli a sehlooho: mohlanka (diakonos) le lekhoba (doulos). Liphetoletong tse ling, lentsoe la pele, mohlanka, hangata le tolokoa e le “mosebeletsi,” kapa “mohlanka ea holehuoeng.” Ka hona bobeli mantsoe ana a lahla matla a se neng se boleloa ke Jesu. Leha Jesu a sa ka a rata ho felisa mofuta oa boetapele, seo a ileng a se toboketsa ke hore baetapele ba kereke ba tlameha ho ba basebeletsi le makhoba a batho ba Molimo pele. Maemo a bona ha se a hore ba sebelise lipotongoane holim'a ba bang, kapa ho ipha tlhomphele le botumo. “Kreste o ne a thakhola 'muso oa metheo e fapaneng. O ile a biletsa batho, eseng ho tla ba le matla, empa ho sebeletsa, ba matla ba jare mathata a ba fokolang. Matla, maemo, talenta, thuto, li ne li fa ea nang le tsona monyetla o moholo oa ho sebeletsa ba bang.”—Ellen G. White, *The Desire of Ages*, leq. 550.

Bala Johanne 13:1-20. Ke mohlala ofe oa boetapele oo Jesu a o fileng barutuo ba Hae? Ke sefe seo Jesu a ntseng a leka ho re ruta sona litemaneng tsee? Ke joang re ka bontšang metheo e hlahang moo liketsong tsohle tsa rona ho ba bang, kahare le kantle ho kereke?

Ho boloka Bonngoe ka Kerekeng

Bala 2 Timothea 2:15 le Tite 1:9. Ho latela keletso ea Pauluse eo a e etsetsang Timothea le Tite, ke mesebetsi efe ea bohlokoa-hlokoa eo e leng boikarabello ba moetapele le moholo oa kereke ea tšepahalang?

Ela hloko kamoo Pauluse a toboketsang ho boloka lithuto tsohle li hloekile kateng. Sena se bohlokoa bakeng sa bonngoe, haholo-holo hobane motho a ka etsa khang ea hore, ho feta eng kapa eng, lithuto tsa rona ke tsona tse tlamahanyang kereke bonngoeng. Hape, re le Baleti, re le batho ba tsoang mefuteng e fapaneng ea bophelo, meetlo, le kholisong tse fapaneng, bonngoe ba rona ho Krete bo fumanoa kutloisisong ea rona ea 'nete eo Krete a re fileng. Ebang re ferekangoa ke lithuto tsena, joale ho tla latela likhula-khulano le likarohano, haholo-holo ha re atamela bofelo. “Ke u laela ke hona haholo pela Molimo, le pela Morena Jesu Krete, ea tlang ho ahlola ba phelang le ba shoeleng mohlang a tlang ka 'muso oa hae, ke re: u bolele lentsoe, u phehelle nako ha e tšoaneleha, le ha e sa tšoanelehe; u laee, u khalemele, le ka mamello eohle le ka ho ruta. Hobane nako e tla ba teng eo ba ke keng ba mamella thuto ea pholoho, empa ka baka la ho hlohlona ha litsebe tsa bona, ba tla imamella baruti ba lumellanang le litakatso tsa bona. 'Me ba tla khelosa litsebe tsa bona 'neteng ho li iisa litšomong” (2 Tim. 4:1-4). Ka mantsoe ana, Paulosi o tsepamisa maikutlo a hae a bululetsoeng ke Moea ho tlang la bobeli hoa Jesu le letsatsing la kahlolo. Moapostola o sebelisa matla a hae ohle ao aa filoeng ke Molimo (sheba 1 Tim. 1:1) ho fa Timothea keletso ena ea bohlokoa. Ho latela maemo a mehla ea bofelo, ha lithuto tsa bohata li runya haholo le bokhopo bo ata, Timothea o tlameha ho ruta lentsoe la Molimo. Bona ke bosebeletsi boo a bo bitselitsoeng.

E le karolo ea bosebeletsi ba hae ba ho ruta, Timothea o tlameha ho kholisa, a khaleme, a khotatse. Maetsi ana a hopotsa ka tataiso e fanoang ke Mangolo (2 Tim. 3:16). Ho hlakile, mosebetsi oa Timothea ke ho latela, ho ruta, le ho kenya tšebetsong seo a se fumanang mangolong, 'me a etse sena ka mamello le bonolo. Ho halefeloa haho na mohla ho tlisang moetsalibe ho Krete. Ka ho latela se ngotsoeng ke Pauluse, le ho se latela tlas'a tataiso ea Moea o Halalelang, le ka moea oa boetapele ba bohlokoa, Timothea e tla ba sebetsa se matla se kopanyang kereke.

Tse ling tsa litsela tse ka etsahalang tseo re ka thusang baetapele ba kereke ea rona ho boloka bonngoe ka kerekeng ke life? Ke joang re ka etsang bonnete ba hore re lutse re le libetsa tse tlisang kopano ho e-na le karohano, le har'a liqhoebeshano?

Khalemo Kerekeng

E 'ngoe ea lintlha-kholo tsa tlhophiso ea kereke ke ho sebetsana le ho khalema. Kamoo ho khalema ho thusang ho boloka bonngoe ba kereke ka nako tse ling e ba ntlha e hlokolosi haholo, eo ho leng bonolo ho se e utloisise. Empa ho ea ka Bible, khalemelo kerekeng e itšetlehile ntlheng tse peli tsa bohlokoa: ho boloka bohloeki ba lithuto le ba bophelo le litloaelo tsa kereke. Joalokaha re se re bone, Testamente e Ncha e toboketsa bohlokoa ba ho boloka bohloeki ba lithuto tsa Bible har'a ho runya ha bokoenehi le lithuto tsa bohata, haholo-holo bofelong ba nako. Taba e tsoanang e lokela ho etsahala ka ho boloka seriti sa motse khahlanong le boitsoaro bo bobbe, le bobolu. Ka lebaka lena, ho buuo ka mangolo ana "le molemo oa ho ruta, oa ho kholisa, oa ho laea, le oa ho holisa ka kholo ea ho loka" (2 Tim. 3:16).

Bala Mattheu 16:19 le 18:15-20. Ke metheo efe eo Jesu a e fileng kereke malebana le khalemo le ho sebetsana le ba molato?

Bible e tšehetsa taba ea khalemelo le boikarabello ba rona e mong ho e mong maphelong a rona a semoea le boitsoaro ba rona. Ha e le hantle, e 'ngoe ea matšoao a khethollang kereke ke ho halalela ha eona, kapa ho arohana ha eona le lefatše. Re hlile re fumana mehlala ea maemo a thata a neng a hloka hore kereke e sebetsane le ona ka kelello tse pholileng khahlanong le boitsoaro bo sa amoheleng. Boitsoaro bo tlameha ho ba teng ka kerekeng.

Ke metheo efe eo litemana tsee li rutang ho e latela ha re sebetsana le maemo a taba tse thata ka kerekeng? Matt. 7:1-5; Ba-Gal. 6:1, 2.

Re ka se hane lithuto tsa Bible malebana le tlhokeho ea khalemelo ka kerekeng. Re ka se tšepahalle lentsoe ntle le eona. Empa ela hloko boleng ba ho pholosa bongateng ba likhalemelo tsena. Ka hohle kamoo ho ka khonehang, khalemelo e tlameha ho pholosa. Hape, re tlameha ho hopola hore, bohle re baetsalibe, le hore bohle re hloka mohau. Kahona, ha re khalemela re lokela ho etsa joalo ka boikokobetso le ka ho lemoha mefokolo ea rona, le rona.

Ke joang, ha re sebetsana le ba entseng liphoso, re ka ithutang ho etsa joalo ka moea oa ho pholosa ho feta ho fana ka kotlo?

Ho Hlopheha Bakeng sa Thomo

Joalokaha re bone kotareng ena eohle (’me se hlohang pheto-pheto), re le kereke re hlophisehile le ho ba le ntho e le ’ngoe thomong, bakeng sa ho fihlela kantle. Ha re sehlotšoana sa batho ba nahanang ka ho tšoana ba ikopanelang ho tla thoholetsana ka seo re se lumelang (leha le hona ho ka ba bohlokoa, le hona). Re bilelitsoe ho arolelana le lefatše, ’nete, eo rona ka bo rona, re e ratileng.

Ho Mattheu 28:18-20, Jesu o file barutuo ba Hae litaelo tsa ho qetela bakeng sa thomo ea bona lefatšeng. Hloaea mantsoe a sehlooho taelong ea Jesu. Mantsoe aa a renetse ho kereke kajeno?

Thomo e kholo ea Jesu ho barutuo ba Hae e kenyetsa maetsi a mane a bohlokoa-hlokoa: e-cang, etsang barutuo, le ba kolobetse, le ba rute. Ho ea ka sebopeo-puo sa se-Gerike temaneng tse, leetsi le ka sehloohong ke ho etsa barutuo, e be a mang a mararo a bontša kamoo sena se ka fihleloang kateng. Barutuo ba etsoa ha balumeli ba e-ea lichabeng tsohle, ho ruta evangeli, ba kolobetse batho, e be ba ba ruta ho boloka tseo Jesu a ba laetseng tsona.

Ha kereke e arabela thomo ena, ’Muso oa Molimo o oa hola, ’me batho ba bangata ho tsoa lichabeng tsohle e ba karolo ea ba amohetseng Jesu e le Morena le Mopholosi oa bona. Ho mamela taelo ea ho kolobetsoa le ho boloka lithuto tsa Hae ho theha lelapa le lecha la ka lefatše lohle. Barutuo ba bacha ba boetse ba fuoa tiisetso ea boteng ba Jesu tsatsi le leng le le leng ha le bona ba etsa barutuo ba bang. Boteng ba Jesu ke tšepiso ea boteng ba Molimo. Evangeli ea Mattheu e qala ka phatlalatso ea hore tlhaho ea Jesu e malebana le hore “Molimo o na le rona” (Matt. 1:23) e be e qetella ka tšepiso ea boteng ba Jesu bo sa khaotseng ho rona ho fihlela a khutla lekhetlo la bobeli.

“Kreste h’a ka a bolella barutuo ba Hae hore mosebetsi oa bona o tla ba bonolo. . . . O ba tiiselitse hore o tla ba le bona; le hore haeba ba ka tsoa ka tumelo, ba tla tsamaea tlas’a sekhele sa ea matla ’ohle. O ile a ba kopa ho ba matla le ho ba sebete; hobane ea matla ho feta manyeloi o tla ba lekhotleng la bona—Mookameli oa mabotho a leholimo. O fane ka tsohle tse hlokehang bakeng sa ho phetha mosebetsi oa bona le ho beha katleho ea oona matsohong a Hae. Ha feela ba mamela lentsoe la Hae, ’me ba sebetsa ba ipapisitse le Eena, ba ke ke ba hloleha ho hang.”—Ellen G. White, *The Liketso of the Apostles*, leq. 29.

Nahana ka moelelo oa se boleloang ke tšepiso ea boteng ba Jesu har’a batho ba Hae ho fihlela a khutla lekhetlo la bobeli. Bonnete ba tšepiso ee bo tlameha ho re ama joang ha re ntse re leka ho phetha thomo eo re e fuoeng ke Jesu?

Ho Ithuta Haholoanyane:

Ellen G. White, “Individual Responsibility and Christian Unity,” maq. 485-505, ho *Testimonies to Ministers and Gospel Workers*; “Unity in Diversity,” maq. 483-485, le “Church Discipline,” maq. 498-503, ho *Gospel Workers*. Bala lingoloa tsena “Church,” maq. 707-710, le “Church Organization,” maq. 712-714, ho The Ellen G. White Encyclopedia. “Metho ea boetapele bo botle e ama mafapha ohle a sechaba, ho kenyeletsa le kereke. Le ha ho le joalo, moetapele kerekeng o tlameha ho ba se fetang moetapele. O tlameha ho ba mohlanka. “Ho na le toatšano e hlakileng pakeng tsa ho ba moetapele le ho ba mohlanka. Motho a ka etella pele a ba ba mohlanka joang? Na moetapele h’a nke setulo se hlomphehang? Na h’a laele le ho lebella ba bang ho mo mamela? Ke joang, joale, a nkang maemo a tlase a ho ba mohlanka, a ho amohela litaelo le ho li phethahatsa? “Hore re rarolle toantšano ena re lokela ho sheba ho Jesu. O bontšitse kemeli e holimo-limo ea boetapele ba bosebeletsi. Ka nako e tšoanang, e bile moetapele ea fetang bohle ba kileng ba e ba teng lefatšeng.”—G. Arthur Keough, *Our Church Today: What It Is and Can Be* (Washington, D.C., and Nashville: Review and Herald, 1980), leq. 106.

Lipotso tsa Puisano:

1. Tsepamisa maikutlo haholo tabeng ea moetapele oa mohlanka. Ke mehlala efe, haeba e kaba teng, eo re ka e fumanang lefatšeng lee la sebe?
2. Bala hape Mattheu 20:25-28. Ke sefe seo see se re bolellang sona mabapi le kamoo Molimo a utloisisang moelelo oa lentsoe ea moholo (Matt. 20:26) ho fapana le kamoo lentsoe le utloisisoang kateng lefatšeng?
3. Haeba o mong oa mesebetsi ea baetapele ba kereke ke ho boloka bonngoe, re lokela ho etsa joang ha baetapele ba khibela, ha botho ba bona bo ba sitisa ho ba mehlala e metle?
4. Ke hobaneng ha ho le bohlokoa hore re sebelise khalemelo ea kereke ka moea oa lereko le lerato ho ba etsang liphoso? Hobaneng Mattheu 7:12 e tlameha ho lula e tla pele ka likelellong tsa rona nakong ea khalemelo?

Kakaretso: Tlhophiso e ntle ea kereke e bohlokoa thomong ea kereke le bonngoe ba balumeli. Krete ke hlooho ea kereke, 'me baetapele ba kereke ba tlameha ho latela mehlala oa Hae ha ba etella pele batho ba Molimo. bonngoe bo bolokoa ka ka ho ruta lithuto tsa lentsoe la Molimo ka botšepahi le ho phela ka ho tšepahalla lentsoe leo.